

PM jamin cadangan bantuan JKM RM1,000 sebulan dilaksanakan segera

Kuala Lumpur: Tan Sri Muhyiddin Yassin memberi jaminan, cadangan menaikkan kadar bantuan Jabatan Kebajikan Masyarakat (JKM) kepada RM1,000 sebulan, berbanding RM200 hingga RM300 sekarang, akan dilaksanakan segera.

Perdana Menteri berkata, sebagai kerajaan yang prihatin, beliau akan memastikan golongan itu mempunyai hak dan peluang sama rata untuk menjalani kehidupan seperti anggota masyarakat yang lain.

“Mengambil kira keadaan ekonomi serta kos sara hidup semasa, saya mengusulkan agar bantuan bulanan JKM yang pada masa ini berjumlah antara RM200 dan RM300 kepada mereka yang layak, dinaikkan kepada RM1,000.

“Pastinya, golongan orang kurang upaya (OKU) juga termasuk dalam kumpulan masyarakat yang akan mendapat faedah daripada kenaikan itu.

“Saya akan pastikan cadangan ini dapat dilaksanakan segera. In-sya-Allah,” katanya dalam hantaran di laman Facebooknya sempena Hari OKU Sedunia, semalam.

Pada Ogos lalu, Muhyiddin dilaporkan mengusulkan kenaikan bantuan bulanan terbabit dan usaha membantu golongan itu, termasuk golongan berpendapatan 40 peratus terendah (B40) adalah aspirasi kerajaan Perikatan Nasional (PN) di bawah pimpinannya.

Perdana Menteri berkata, golongan OKU adalah sebahagian daripada masyarakat yang sentiasa dekat dan diberi perhatian

olehnya dan juga kerajaan.

“Saya sendiri beberapa kali turun menemui golongan ini sebagaimana ketika kunjungan saya ke Projek Perumahan Rakyat (PPR) Desa Rejang di Setapak serta PPR Taman Sri Keramat, Putatan, Sabah sebelum ini,” katanya.

Katanya, kerajaan melalui Kementerian Kewangan juga sudah mengumumkan beberapa inisiatif yang boleh membantu golongan terbabit ketika membentangkan Belanjawan 2021, baru-baru ini.

Antaranya, menaikkan bantuan bulanan OKU tidak berupaya bekerja daripada RM250 kepada RM300, kadar elaun pekerja OKU dinaikkan daripada RM400 kepada RM450 serta bantuan penjagaan OKU dinaikkan daripada RM350 kepada RM500.

Mengikuti rekod JKM, Muhyiddin berkata, bilangan OKU berdaftar di Malaysia setakat ini ialah 581,265 orang dan beliau berharap kempen mendaftarkan mereka dipergiatkan lagi bagi memastikan tiada yang tercicir dan tidak diberikan perhatian.

“Perkara ini sangat penting untuk menjamin golongan ini tidak terlepas daripada menerima bantuan kerajaan, terutamanya ketika situasi sukar penularan pandemik COVID-19.

“Saya doakan semoga golongan OKU diberikan tempat sebaiknya dalam kalangan masyarakat, seterusnya dapat sama-sama berpeperanan dalam pembangunan negara. Selamat Hari OKU Sedunia 2020,” katanya. **BERNAMA**